

FISI MLAFI



Kimotho G. Gabriel

Kimechapishwa na:
Starlink Translation Centre
P.O. Box 241-00600 Nairobi

© Kimotho G. Gabriel, 2017

Haki zote zimehifadhiwa. Hairuhusiwi kuiga, kunakili,
kupiga chapa, kutafsiri au kukitoa kitabu hiki, kwa jinsi
yoyote ile, bila idhini, kwa maandishi, ya Kimotho G.
Gabriel.

Chapa ya kwanza 2017

ISBN 978-9966-1979-6-2

Michoro imechorwa na Abraham Ngume
Kurasa zimeruwazwa na Puritan Designs

Kwenye msitu mmoja upande wa Kiambogo, paliishi wanyama wa kila aina. Simba alikuwa kiongozi wao. Wanyama wote walimheshimu na kumwogopa. Walisema kichinichini kwamba Simba alijichagua mfalme.



Hakuna mnyama ambaye angekubali kuyasema maneno haya kwa kuhofia maisha yake. Hata hivyo, walimwabudu na kumtukuza.

Simba huyo kwa jina Kimaara alikuwa mnene kupita kiasi. Sura yake iliogofya. Aliponguruma tu, wanyama wote walikusanyika kumsikiliza. Ijapokuwa wanyama wote walimwogopa, Kimaara hakukosa kuwapa mawaidha mazuri ya kutia moyo na kuhifadhi msitu wao.

Kiambogo ulikuwa msitu wenye nyati wengi kushinda misitu mingine katika maeneo hayo. Nyati hawa walikuwa wanene na wakubwa kupita kiasi. Hata wanyama walao nyama kama Chui, Duma na Simba hawakujaribu kuwakaribia. Waliogopa

pembe zao kubwa na kali. Nyati hawa waliwaonea huruma Swara, Pundamilia na wanyama wengine kwa kuuawa ovyoovyo na jamii ya Chui.

Siku moja, Kimaara aliwakuta Nyati ishirini wakinywa maji. Mate mengi yalimdondoka alipoona walivyokuwa wamenona. Aliapa kwamba lazima angepata kitoweo cha nyama ya nyati. Aliwanyemelea huku akimchagua mmoja aliyekuwa mkubwa zaidi. Alijua kwamba akimpata huyo, hatawinda kwa siku kadhaa.

Kwa bahati mbaya, Nyati mmoja alimwona na kutoa mlio mkali uliowafahamisha wote kwamba maisha yao yalikuwa hatarini. Walitimua kivumbi, wakitoroka huku Simba akiwa nyuma yao unyounyo. Kweli mbio za

sakafuni huishia ukingoni. Kimaara alimrukia yule nyati lakini hakuanguka. Alizidi kukimbia huku Simba akiwa mgongoni. Mara Simba akapata nafasi aliyokuwa akiingojea. Alimshika shingoni kwa meno yake makali huku Nyati akijaribu kumwangusha. Nyati



aliangushwa chini lakini hakufa moyo.
Alijaribu mbinu zote akashindwa. Bahati
nzuri aliweza kumpiga pembe kwenye
mkono wake wa kushoto.

Simba aliweza kumnyonya
damu yule Nyati hadi akazimia.
Alipomwachilia, aligundua kwamba
alikuwa amedungwa. Alijaribu kumvuta



yule nyati hadi nyumbani kwake.
Ilimchukua muda mrefu kwa kuwa
alikuwa akitumia mkono mmoja tu.
Baada ya kumfikisha, Simba alilala kwa
kuchoka. Asubuhi alipoamka, mkono
wake ulikuwa bado unavuja damu. Kwa
bahati nzuri, alimwona Sungura akipita:

“Sungura rafiki yangu, njoo hapa.”

“Naam, mkubwa wangu, ungetaka
nikufanyie nini?”

“Kwanza, tafuta dawa nzuri na
unipake kwenye mkono huu,” Kimaara
alimwambia.

“Unajua kuwa mimi ni mganga wa
waganga, nitakupa dawa ya kienyeji
itakayo kuponya. Hebu niuone mkono
wako”.

Baada ya kuukagua, Sungura
alienda kuleta dawa na kumpaka.

Dawa yenyewe ilikuwa kali sana hata Simba alikuwa karibu kutoa machozi. Jambo ambalo halijawahi kuonekana kwa mfalme yeyote. Baadaye, alimpa Sungura mawaidha kahdaa ya kufuata.



“Kwa vile nimeumia sana, naenda kulala halafu mara moja umchune huyu Nyati, unichomee moyo, maini, figo na wengu.” Simba akaagiza.

“Niko katika utumishi wako bwana, nitafanya kama ulivyoniagiza.” Sungura akasema.

Muda si muda, Simba aliingia ndani ya pango kubwa na kulala. Sungura naye akamchuna yule Nyati mara moja. Alitoa vile viungo alivyoagizwa na kuvichoma vizuri. Nyama hizi zilitoa harufu nzuri na ya kupendeza. Sungura alizitamani mno lakini aliogopa kumkasirisha Simba. Alikata kipande kidogo cha ini na kula. Lo! Hakuwa amewahi kusikia utamu wa aina ile. Mate yalimtiririka kwa wingi kama fisi. Alijaribu kuvumilia akashindwa.



Alikata kipande kingine cha figo.
Kipande kile kilimfanya atoe machozi.
Mwisho alikata kauli, liwalo na liwe.
Alizichukua zile nyama zote na akazila
haraka haraka. Kwa kweli alijiona
kama Fisi kwa kitendo kile. Mara moja

alikata vipande vingine vya nyama na kuvichoma vizuri sana na kumpelekea Simba.

“Wapi vile vipande nilivyoagiza?”
Simba akanguruma.

“Samahani bwana wangu, niliviacha motoni, nikaenda mtoni kuchota maji na niliporudi, zilikuwa zimeungua kabisa. Basi nikaona hazifai kuandalia mfalme.”
Sungura akasema akilia machozi. Simba aliendelea kupikiwa na Sungura kwa siku kadhaa.

Siku moja Fisi alinusia harufu ya nyama na kuifuata. Alimpata Sungura na kumwuliza kilichotokea. Sungura alimwarifu kwamba Simba alikuwa mgonjwa. Fisi aliomba ruhusa kwenda kumwona. Sungura alienda kwanza



kumwuliza Simba kama alikuwa na
kibali cha kuruhusu yeyote aje amwone.
Baadaye, Fisi aliruhusiwa kuingia.
Alimkuta Simba kitandani. Alionekana
mgonjwa kweli. Simba alimwambia
Sungura awalettee chakula. Sungura
alifanya kama alivyoagizwa lakini

kwa Fisi akaweka mifupa mitupu. Fisi alikasirika lakini hakutaka kuonyesha hasira yake kwa mfalme. Alisema kimoyo moyo kwamba lazima atalipiza kisasi.

Baada ya siku kadhaa, Fisi yule alifika tena. Aliomba kumwona Simba na akaruhusiwa. Sungura kama kawaida alimwekea mifupa mingi. Kisha akaondoka kwenda mtoni kuchota maji. Fisi alipoachwa peke yake na Simba, aliona kwamba ni wakati mwafaka wa kufanya mapinduzi. Aliangalia vile Sungura alivyokuwa anaishi vizuri na kula nyama nyingi. Aliona kama ingekuwa yeye hata rangi ya ngozi yake ingebadilika. Alimwuliza Simba,



“Mbona mfalme unaendelea kuugua na huku unakaa na mganga kwa nyumba?”

“Mganga gani?” Simba akauliza kwa hamaki.

“Kwani wewe hujui kwamba Sungura ni mganga mashuhuri. Wanyama wote humwendea kwa matibabu.” Fisi akasema akichekacheka halafu akaongeza, “Ama unataka aendelee kula nyama na huku wewe unazidi kuumia?”

Simba alikasirika sana. Aliona uchoyo wa Sungura. Alisahau yote ambayo sungura alikuwa amemfanyia. Alimwambia Fisi kwamba akifika tu, atamuua na wale nyama zake halafu Fisi ndiye atabaki akimpikia. Kicheko cha Fisi kilisikika mbali sana.

Sungura alipofika tu, hata kabla hajauweka mtungi wa maji chini, Simba alimwita kwa hasira kuu.



“Sungura, leta hayo masikio yako hapa mara moja.” Simba akaitana.

Sungura alipiga bongo na akafahamu kwamba lazima Fisi amemwendea na kumsengenya. Aliuweka mtungi chini na kwa haraka akamwendea Simba.

“Wewe, ni kweli kwamba u mganga mashuhuri na unaniachilia niendeleo kuumia? Leo hii nitakuua.” Simba akaapa.

“Samahani bwana wangu, mimi ni mganga kweli, nimekutafutia dawa kwa wakati huu wote. Dawa ya mkono wako inapatikana kwenye ngozi iliyoko mgongoni mwa Fisi. Ukiipata hiyo nikufunge mkononi uta...”

Simba hakungojea Sungura amalize. Alimrukia Fisi kwa kasi na hata kabla ya Fisi kufahamu alichokuwa akifanya, alikuwa ametolewa ngozi yote kutoka



mabegani hadi kwenye mkia. Fisi alipiga duru huku akitoroka kwa kasi zaidi ya miguu yake ilivyoweza kumpeleka.

Simba alimpa Sungura ile ngozi.
Sungura aliiikata vizuri kwa kisu halafu
akakiosha kile kidonda cha Simba na
akamfunga ile ngozi vizuri. Ukweli ni



kwamba tangu siku hiyo Simba alipata nafuu kweli.

Baada ya siku tatu Simba, alikuwa amepona kabisa. Fisi naye hakuweza kutokea mbele ya wanyama wengine. Alikaa kwenye pango lake huku akiuguza majeraha yake. Hangeweza kumwendea Sungura ili apate dawa. Kwa hivyo yaliota manyoya mengi kwenye kovu lile ambalo mpaka wa sasa yanaonekana mgongoni mwa Fisi.

Sungura alitangazwa rasmi kama mganga wa wanyama wote na mshauri mkuu wa Simba.

Baada ya kupona, Simba aliwaandalia wanyama wote karamu murua. Fisi tu ndiye hakuweza kufika kuona haya.

Mpaka sasa, Fisi hatokei wanyama
wengine wakila, ila huja baadaye
wakishaondoka na kula mifupa.

Maswali

1. Wanyama waliishi katika msitu gani?
2. Wanyama waliogopa mnyama gani?
3. Simba aliitwaje?
4. Simba ana pembe ngapi?
5. Nani alidungwa mkono?
6. Simba alitaka apikiwe nyama gani?
7. Sungura alienda mtoni kufanya nini?
8. Fisi alimwambia Simba nini?

9. Ni methali gani iliyotumiwa katika hadithi hii?

10. Tunajifunza nini kutokana na hadithi hii?